

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ԼՈՐ ՇՐՋԱՆ, Ժ. Տարի, Թիւ 468, Ուրբաթ, 21 ԴԵԿՏԵՄԲԵՐ, 2018

ՀԱՄԱՅՆՔԱՅԻՆ

ՀԱՄԱԶԳԱԻՆԻ ՔՈՒԷՅԹԻ ՄԵԿՈՒՍԻ ԿԱԶՄԻ Գ.

ԸՆԴՀԱՆՈՒՐ ԺՈՂՈՎԸ



14 Դեկտեմբեր 2018-ին, Քուէյթի մէջ գումարուեցաւ Համազգայինի Քուէյթի մեկուսի կազմի Գ. ընդհանուր ժողովը:

Ժողովի ընթացքին քննարուեցան բազմաթիւ թեմաներ:

Աւարտին, ժողովս ընտրեց իր նորընտիր վարչութիւնը, որմէ ետք Կեդրոնական Վարչութեան Ատենապետ, ընկ. Մկրտիչ Մկրտիչեանի ներկայութեամբ ընտրեց իր դիւանը հետեւեալ ձեւով:-

- Ատենապետ՝ Ընկ. Տիգրան Պայաթեան
- Ատենադպիր՝ Ընկ.Դալար Մէլիքսեթեան
- Գանձապահ՝ Ընկ. Գեորգ Յովակիմեան
- Հաշուապահ՝ Ընկ. Արամ Յակոբեան
- Գոյքապահ՝ Ընկ. Յովհաննէս Սերոբեան
- Խորհրդական՝ Ընկ. Հուրի Պերպերեան
- Խորհրդական՝ Ընկ. Միրէլ Գույումճեան

Այս առթիւ, կը շնորհաւորենք նորընտիր կազմը ու կը մաղթենք յաջողութիւն եւ անխափան երթ: Վարձքը կատար շրջանաւարտ վարչութեան:

ՀԱՅԿԱԿԱՆ

**Հրայր Մարուխեանի Շիրիմին Վրայ Երդում Տալով՝
Երիտասարդները Միացան ՀՅԴ-ի Շարքերուն**

19 Դեկտեմբերին ազգային-քաղաքական ակնաւոր գործիչ, ՀՅԴ Բիւրոյի նախկին ներկայացուցիչ Հրայր Մարուխեանի ծննդեան 90-ամեակն է: Այս առիթով ՀՅԴ Հայաստանի Գերագոյն մարմինը յարգանքի այցելութիւն տուաւ Երեւանի Կեդրոնական գերեզմանատան մէջ գտնուող անոր շիրիմին, ուր նաեւ տեղի ունեցաւ կուսակցական երդման արարողութիւն:

Ներկայ էին Հրայր Մարուխեանի այրին՝ Անահիտ Մարուխեանը, դուստրը՝ Շադիկը, թոռնուհին՝ Անահիտը, ՀՅԴ Բիւրոյի եւ Գերագոյն մարմինի անդամները, ՀՅԴ Հայաստանի ուսանողական եւ երիտասարդական միութիւններու անդամներ, պատանիներ, քաղաքացիներ եւ սփիւռքէն հիւրեր:

Այս առիթով խօսք առաւ Գեղամ Մանուկեան, որ դիմելով ներկաներուն եւ դաշնակցական դառնալու երդում տալ պատրաստուող երիտասարդներուն՝ ըսաւ. «Այսօր հոս ենք յիշատակի առիթով, սակայն այս հաւաքը աւելի շատ երդման վերակրկնութիւն է, մեր ուխտի վերահաստատումն է, յիշատակի խօսք ըսելու ու կրկնելու առիթ է, որ մեր ուղին ու պայքարը անսասան են: Այդ պայքարը նոր ուժ կը ստանայ մեր բոլոր նուիրեալ նահատակ հերոսներով, յատկապէս այսօր՝ ընկեր Հրայր Մարուխեանի շիրիմին մօտ:

«Խորհրդանշական է այս օրը, որովհետեւ յիշատակի խօսք ըսելը վայրկեանի մը պատմութեան նայիլն է լոկ, պատմութեամբ ապրիլն է: Այսօր մենք հոս ենք մեր երիտասարդ նոր սերունդով, որ քանի մը վայրկեան ետք պիտի տայ դաշնակցականի երդումը եւ պիտի միանայ մեծ ընտանիքի մը, որուն հազարաւոր անդամները եւս այսօր կը խոնարհին ընկեր Հրայրի շիրիմին առջեւ»:



Այնուհետեւ օրուան խորհուրդին մասին խօսեցաւ ՀՅԴ Բիւրոյի անդամ Կիրո Մանոյեան: Դիմելով Հ. Մարուխեանի ընտանիքի անդամներուն՝ ան նշեց. «Այսօր մենք կը յիշենք ընկեր Հրայրը, որ եւ հայոց պատմութեան, եւ Դաշնակցութեան պատմութեան մէջ համարեայ երեք տասնամեակ եղած է ամենէն կարեւոր դէմքերէն մէկը: Ան կը խորհրդանշէ Դաշնակցութեան սերնդափոխութիւնը. սփիւռքի մէջ ծնած սերունդը կու գար ստանձնելու Դաշնակցութեան բարձրագոյն պատասխանատուութիւնը: Կուսակցութեան մէջ ընկեր Հրայրին սերունդը կը յատկանշուի քանի

մը կարեւոր ուղղութիւններով, որոնք իրենց մեծ ազդեցութիւնը ձգեցին մեր կուսակցութեան եւ, ընդհանրապէս, ժողովուրդին կեանքին մէջ:

«Առաջինը՝ կուսակցութիւնը իր գաղափարական հիմունքներուն վերադարձնելն էր, կամ գաղափարական հիմունքները կուսակցութեան վերադարձնելն ու զայն արդիականացնելը:

Խօսքը կը վերաբերի Դաշնակցութեան ծրագիրի վերանայման, Դաշնակցութեան ծրագիրին մէջ ընկերվարական գաղափարախօսութեան արդիականացման ու մեր քաղաքական պահանջներու յստակացման:

«Երկրորդ կարեւոր ուղղութիւնը Հայ դատի համար ուժեղ պայքարն է, որ իր ազդեցութիւնը ունեցաւ ո՛չ միայն մեր երիտասարդ սերունդին վրայ, այլ նաեւ համաշխարհային իրականութեան մէջ ճեղքեց լռութեան պատը, որ բարձրացուած էր Հայ դատին շուրջ:

«Երրորդը «Դէպի երկիր»-ն է, որ սկիզբ առաւ արցախեան շարժումէն, բայց վերջաւորութեան նաեւ առաջնորդեց արցախեան շարժումը: Արցախեան շարժումը վերաճեցաւ արցախեան ազատամարտի, եւ, անշուշտ, Հայաստանի անկախութեան ու Հայաստանի Հանրապետութիւն կուսակցութեան վերադարձի հարցին մէջ կարեւոր դերակատարը, առաջնորդող դէմքը ընկեր Հրայր Մարուխեանն էր»:

Մանոյեան ընդգծեց, որ բնականաբար, այդ բոլորը Հրայր Մարուխեան իրականացուցած է կուսակցութեան ղեկավար մարմինին միասնականութեամբ, սակայն անհերքելի է՝ ամէն ինչ իրականացուած է անոր ոգեշնչումով:

Ան նաեւ դիտել տուաւ, որ Հրայր Մարուխեանի մասին խօսելու ատեն անկարելի է չանդրադառնալ այն վատ փորձառութեան, որ պատահած է Մարուխեանի հետ Երեւանի մէջ: «Երբ Շուշիի ազատագրումէն ընդամենը քանի մը շաբաթ անց այդ ժամանակուան Հայաստանի նախագահը (Լեւոն Տէր Պետրոսեան) ընկեր Հրայրը անարդար եւ անհիմն ձեռով արտաքսեց երկրէն: Դժբախտաբար, այսօր որոշ նմանութիւններ կան Հայաստանի իշխանութիւններուն մօտեցումներուն մէջ: Եթէ այն ժամանակ Շուշիի ազատագրումն ու այդ հարցին մէջ Դաշնակցութեան առաջնորդող անհերքելի դերակատարութիւնը մղած էին, որ այդպիսի ուժեղ հարուած փորձէն հասցնել կուսակցութեան, այսօր տակաւին այդ ուժեղ հարուածը տալու խնդիր չեն դրած իրենց դիմաց, բայց նոյն մօտեցումն է կուսակցութեան նկատմամբ: Այդ ժամանակուան նախագահը իբր թէ կը պաշտպանէր Դաշնակցութիւնը իր ղեկավարութենէն, Դաշնակցութիւնը իբր թէ կը պաշտպանէր ընկեր Հրայրէն, իբր թէ մտահոգ էր Դաշնակցութեամբ եւ այդ հարցին մէջ կը մեղադրէր Հրայր Մարուխեանը: Այսօր ալ, դժբախտաբար, վարչապետի պաշտօնակատարը քարոզարշաւի ժամանակ նման սայթաքումներ ըրաւ՝ փորձելով ՀՅԴ Բիւրոյի այսօրուան ներկայացուցիչին իբր թէ պատասխանել, հակադարձել՝ միաժամանակ ըսելով՝ ասիկա ամբողջ Դաշնակցութեան վրայ չտարածէք, Դաշնակցութիւնը լաւ է, բայց ղեկավարն է վատը: Մենք այս բոլորը տեսած եւ յաղթահարած ենք: Եւ այն փաստը, որ մենք այստեղ ենք՝ ընկեր Հրայրին շիրիմին մօտ, կը հաստատէ, որ մեր ուղին է ճիշդը: Ընկեր Հրայր իր մահով եկաւ հաստատելու, որ իր բռնած ուղին էր ճիշդը: Ընկեր Հրայր արտաքսման որոշման դիմաց ինքը առաջարկեց, նոյնիսկ պահանջեց կուսակցութենէն, որ ՀՅԴ-ն յանկարծ չդիմէ այնպիսի քայլերու, որ երկիրը ապակայունանայ: Ան այդ անարդար որոշումին ենթարկուեցաւ, բայց իր մահով հաստատեց, որ ճիշդ էր մեր ուղին: Այսօր ալ ճիշդ է մեր ուղին, եւ դիւրին չեն օրերը: Բայց ո՞վ ըսած է, որ Դաշնակցութիւնը դիւրին օրերու համար է», ըսաւ Մանոյեան՝ աւելցնելով. «Եթէ ընկեր Հրայրը ըլլար, պիտի ըսէր՝ «Պի՛նդ կացէք, ընկերնէ՛ր»:

Կիրօ Մանոյեան ընդգծեց, որ Հրայր Մարուխեանի նկարագիրին կարեւորագոյն յատկանիշներէն մէկը երիտասարդներուն վստահիլն էր եւ զանոնք խրախուսելը:

«Մեր այսօրուան դեկավարութեան մեծ մասը ընկեր Հրայրին հետ երիտասարդութեան օրերուն որոշ փորձառութիւն ունեցած են, եւ անոր այդ ներշնչանքն է, որ այսօր մեզ՝ բոլորս կը ներշնչէ: Վստահ եմ, նոր երիտասարդութիւնը, հակառակ այսօրուան համեմատաբար դժուար օրերուն, եկած է միանալու մեր շարքերուն: Ընկե՛ր Հրայր, կը խոնարհինք քու յիշատակիդ առջեւ եւ կը վերանորոգենք մեր ուխտը՝ շարունակելու պայքարը, մինչեւ որ հասնինք մեր նպատակին՝ ազատ, անկախ, միացեալ Հայաստանին, ուր կը տիրէ քու դաւանած ընկերվարական հասարակակարգը, հաւասարութիւնը: Պիտի ընդունինք, որ այս օրերը այնքան ալ դժուար չեն, որքան քու ատենդ, բայց կը խոստանանք՝ պիտի յաղթահարենք ամէն դժուարութիւն եւ ուրախ ենք, որ դուն մեր մէջ ես, եւ միշտ ալ կրնանք հաշուետու ըլլալ քեզի», եզրափակեց Մանոյեան:

Երդման կնքահայրը ՀՅԴ Բիւրոյի քաղաքական ներկայացուցիչ Արմէն Ռուստամեանն էր: Երիտասարդներուն երդումը ընդունելու ատեն ան դիմեց անոնց. «Դաշնակցութիւնը եկաւ «Դէպի երկիր» եւ ընձիւղուեցաւ Հայաստանի մէջ: Բոլորս ձեր տարիքին, գուցէ եւ աւելի երիտասարդ, մտանք Դաշնակցութեան շարքերը եւ մեր երթը ուխտեցինք շարունակել մինչեւ Դաշնակցութեան ու մեր ազգի հիմնարար նպատակներու իրագործումը: Ես վստահ եմ, որ ընկեր Հրայրին հոգին այսօր երկինքը կը հրճուի՝ տեսնելով, որ իր երթը շարունակողներ կան, քանի որ դաշնակցականի համար մեծագոյն յիշատակումն է՝ տեսնել պայքարի մէջ մտնող նոր աւիւն, նոր սերունդ, որուն համար Հրայր Մարտիւեանն իր ամբողջ կեանքը նուիրեց, ապա՝ զոհեց: Դուք՝ երիտասարդներդ, պէտք է ձեր ուխտին ու երդման հաւատարիմ մնաք եւ գիտնաք, որ մեր աւագ ընկերները երկինքէն կը հետեւին մեզի, որպէսզի սկսուած երթը մնայ անխափան, մեր գաղափարներն ու սկզբունքները մնան անաղարտ: Դո՛ւք էք ատոր ապացոյցը: Որքան ալ դժուար ըլլայ դաշնակցականի կեանքը, անոր նուիրումը կը պահանջէ էապէս փոխել իր կենցաղը, բայց նաեւ դուք մեծ առաւելութիւն պիտի ունենաք, որովհետեւ պիտի ըլլաք մեր երկրին եւ ժողովուրդին առջեւ ծառայած խնդիրները լուծողներուն շարքին»:

Այնուհետեւ, երդուելով ՀՅԴ Ծրագիրին, Կանոնագիրին եւ ասորճանակին վրայ, շուրջ 2 տասնեակ երիտասարդներ համալրեցին ՀՅԴ մեծ ընտանիքին շարքերը:

Յուշ միջոցառումը աւարտեցաւ «Մենք անկեղծ զինուոր ենք» եւ «Վերքերով լի» երգերով:


Աւարտին ներկաները ծաղիկներ զետեղեցին եւ խունկ վառեցին նաեւ դաշնակցական դեկավար գործիչ Վահան Յովհաննիսեանի շիրիմին վրայ:

«Հայաստան Եւ Ազրպէյճան Առաջին Անգամն Ըլլալով Որոշ Փոխըմբռնման Հասած Են Լեռնային Ղարաբաղի Տազնապին Գծով» Կ՛ըսէ Մամետեարով

Ըստ ազրպէյճանական «Թրենտ» լրատու գործակալութեան, Ազրպէյճանի արտաքին գործոց նախարար Էլմար Մամետեարով, մեկնաբանելով Հայաստանի արտաքին գործոց նախարար Զոհրապ Մնացականեանի հետ Միլանոյի մէջ տեղի ունեցած վերջին հանդիպումը՝ 18 Դեկտեմբերին յայտարարեց, որ Հայաստան եւ Ազրպէյճան երկար ժամանակէ ի վեր առաջին անգամն ըլլալով կրցած են որոշ փոխըմբռնման գալ Լեռնային Ղարաբաղի տազնապին գծով:

Մամետեարով այս հաստատումը կատարեց Պաքուի մեջ տեղի ունեցած երկրին դիւանագիտական ներկայացուցիչներուն նուիրուած ընդունելութեան ընթացքին:

«Կը կարծեմ, որ Միլանոյի մէջ հայ գործընկերոջս հետ վերջին հանդիպումին ընթացքին առաջին անգամ հասանք փոխըմբռնման, ինչ որ չէինք յաջողեր երկար ժամանակէ ի վեր: Մենք պիտի փնտռենք տագնապի լուծման ուղիներ, իսկ Ազրպէյճան կողմ է տագնապի խաղաղ լուծման», աւելցուց Մամետեարով՝ նշելովէ որ յառաջիկայ ամսուան ընթացքին հանդիպում մը եւս պիտի ունենայ Հայաստանի արտաքին գործոց նախարարին հետ:



Մամետեարով նաեւ շեշտեց, որ Լեոնային Ղարաբաղի տագնապին լուծումը 2019-ին պիտի շարունակէ մնալ Ազրպէյճանի արտաքին քաղաքականութեան հիմնական հարցը:

«Հիմնական նպատակն է հասնիլ շօշափելի արդիւնքներու: Ասիկա, կը կարծեմ, ոչ միայն իմ, այլ նաեւ իւրաքանչիւր ազրպէյճանցիի երազն է», եզրակացուց Մամետեարով:

Հայաստանի Հանրապետութեան Արտաքին Գործոց Նախարարութեան Արձագանգը

Հայաստանի Հանրապետութեան արտաքին գործոց նախարարութեան մամլոյ բանբեր Աննա Նադալեան պարզաբանում կատարած է Միլանոյի մէջ Հայաստանի եւ Ազրպէյճանի արտաքին գործոց նախարարներու հանդիպման ընթացքին ձեռք բերուած փոխըմբռնման վերաբերեալ, որուն մասին խօսած է Ազրպէյճանի արտաքին գործոց նախարար Էլմար Մամետեարով:

Հայաստանի Հանրապետութեան արտաքին գործոց նախարարութեան մամլոյ բանբերը ընդգծած է, որ Միլանոյի մէջ ԵԱՀԿ-ի նախարարներու խորհուրդի ծիրին մէջ Հայաստանի եւ Ազրպէյճանի արտաքին գործոց նախարարներու հանդիպումին ընթացքին ձեռք բերուած համաձայնութիւնները հրապարակուած են Հայաստանի արտաքին գործոց նախարարութեան կողմէ:

«Մասնաւորապէս, հանդիպումին յաջորդած հաղորդագրութեան մէջ նշուած է, որ «Զոհրապ Մնացականեանն ու Էլմար Մամետեարովը պայմանաւորուեցան յառաջիկային շարունակել հանդիպումները՝ պահպանելով ձեւաւորուած շարժը»:

Մէկ այլ համաձայնութիւն ձեռք բերուած է Հայաստանի եւ Ազրպէյճանի արտաքին գործոց նախարարներուն եւ ԵԱՀԿ-ի Մինսքի խմբակի համանախագահ երկիրներու պատուիրակութիւններու ղեկավարներուն հետ միացեալ յայտարարութեան վերաբերեալ: Նման ձեւաչափով յայտարարութիւններ երկար ժամանակէ ի վեր կարելի չէր ըլլար ընդունիլ, այնուամենայնիւ, Միլանոյի մէջ կարելի եղաւ համաձայնութիւն ձեռք բերել յայտարարութեան բնագիրին շուրջ», ըսուած է Հայաստանի Հանրապետութեան արտաքին գործոց նախարարութեան դիմատետրի էջին վրայ տեղադրուած հաղորդագրութեան մէջ:

Նիկոլ Փաշինեանը Կ'արտայայտուի Արցախեան Տագնապին Մասին

Հայաստանի Հանրապետութեան վարչապետի պաշտօնակատար Նիկոլ Փաշինեանը վստահեցուց, Արցախի հարցով նոր բան չկայ: Այս մասին ան յայտարարեց լրագրողներու հետ զրոյցի մը ընթացքին՝ անդրադառնալով Ազրպէյճանի արտաքին գործոց նախարարի յայտարարութեան, թէ Հայաստանն ու Ազրպէյճանը փոխըմբռնման հասած են:

«Ես աւելի կ'ուզէի մեկնաբանել մեր յայտարարութիւնները: Միլանոյի մէջ համանախագահներու հետ հանդիպումին Հայաստանի եւ Ազրպէյճանի արտաքին գործոց նախարարները հաղորդագրութիւն մը տարածած են, եւ ըսուած է, որ երկար ժամանակ չէր յաջողած նման բան: Նմանատիպ բազմաթիւ յայտարարութիւններ եղած են վերջին 25 տարիներուն», ըսաւ ան:



Անդրադառնալով ԵԱՀԿ-ի գործող նախագահի անձնական ներկայացուցիչ Անճէյ Քասփրչիքի հետ հանդիպումին՝ Փաշինեան ըսաւ, որ Քասփրչիքի այցելութիւնները նորութիւն չեն եւ աշխատանքային բնոյթ կը կրեն: «Անոնք նախապէս չէին լուսաբանուեր, բայց ես յանձնարարած եմ, որ բոլոր յարաբերութիւնները, հանդիպումները լուսաբանուին, որովհետեւ կը կարծեմ՝ այս հոլովոյթը պէտք է թափանցիկ ըլլայ», ըսաւ ան:

Խօսելով հայաստանեան տարբեր մեկնաբաններու կողմէ կատարուած վերլուծութիւններուն մասին՝ վարչապետի պաշտօնակատարը ըսաւ. «Երբ մեկնաբանութիւն մը կը հնչէ Ազրպէյճանի կողմէ, որ լաւատեսական տարր կը պարունակէ, զիս կը զարմացնէ, որ հայաստանցի շարք մը մեկնաբաններու առաջին կանխավարկածը այն է, որ ինչ որ դաւադրութիւն կայ, իսկ ինչո՞ւ չկայ այնպիսի կանխավարկած, որ Հայաստանի կառավարութիւնը թերեւս յաջողած է համոզիչ փաստարկներ բերել»:

Փաշինեան ընդգծեց, որ Հայաստանի ոչ մէկ իշխանութիւն Արցախի հարցով այնքան թափանցիկ չէ եղած, որքան իրենց կառավարութիւնը: Վարչապետի պաշտօնակատար Նիկոլ Փաշինեան անդրադարձաւ ազրպէյճանական կողմի այն յայտարարութեան, թէ Նախիջեւանի սահմանին անոնք յաջողած են իրենց հսկողութեան տակ առնել 11.000 հեկտար տարածք:

Վարչապետի պաշտօնակատարը յիշեցուց, որ պաշտպանութեան նախարարութիւնը քանի մը անգամ լրագրողներու խումբին հրաւիրած է նշուած տարածք եւ տեղւոյն վրայ ծանօթացուցած է իրավիճակին:

«Ես կը տեսնեմ, որ նախորդ կառավարութեան ներկայացուցիչները մեկնաբանութիւններ կը կատարեն Նախիջեւանի տարածքներուն հետ կապուած»:

Նախիջեւանի ուղղութեամբ ինչ դիրքային խնդիրներ որ տեղի ունեցած են, տեղի ունեցած են փետրուար-մայիս ամիսներուն՝ վարչապետ ըլլալէ առաջ: Այսպէս ըսեմ՝ երկու կողմէն ալ տեղի ունեցած են դիրքային տեղաշարժեր:

Ես պաշտօնապէս կ'ըսեմ, որ այն տարածքները, որոնք 8 մայիսի դրութեամբ եղած են Հայաստանի զինուած ուժերու վերահսկողութեան ներքեւ, կը շարունակեն մնալ Հայաստանի զինուած ուժերու վերահսկողութեան ներքեւ», շեշտեց ան:

Ազգային Ժողովի Ղեկավարութեան Կազմի Թեկնածուները Յայտնի Են

«Իմ քայլ»-ը դաշինքը Հայաստանի Ազգային ժողովի նախագահի պաշտօնին առաջարկած է Արարատ Միրզոյեանի թեկնածութիւնը, իսկ փոխնախագահներու պաշտօններուն՝ Ալեն Միմոնեանի եւ Լենա Նազարեանի թեկնածութիւնը, խմբակցութեան ղեկավարի պաշտօնի թեկնածուն է Լիլիթ Մակունցը, քարտուղարինը՝ Յակոբ Միմիդեանը: Չորեքշաբթի օր այս մասին լրագրողներուն հետ զրոյցի մը ընթացքին նշեց Ազգային ժողովի պատգամաւոր Ալեն



Միմոնեան:

«Նաեւ առաջարկուած են յանձնախումբերու նախագահներու թեկնածութիւնները, եւ կարելի է ըսել՝ ընդունուած են այս բոլոր առաջարկները», ըսաւ Միմոնեան:

ՄԻՋԱԶԳԱՅԻՆ

**Ամերիկեան Ուժերու Հեռացումը՝ 60-100 Օրէն.
Ուաշինկթըն. «ՏԱՀԵՇ Պարտուեցաւ, Սկսանք Մեր Ուժերը
Հեռացնել Սուրիայէն»**

Միացեալ Նահանգներու նախագահ Տանըլտ Թրամփ Չորեքշաբթի օր «Թուիթթըր»-ի վրայ գրառում մը կատարելով յայտնեց, որ «ահաբեկչական խմբաւորումներուն դէմ պայքարը ամերիկեան ուժերուն Սուրիա մնալուն միակ նպատակն էր»՝ աւելցնելով, որ Ամերիկեան Սուրիոյ մէջ ՏԱՀԵՇ-ի պարտութեամբ իր նպատակը իրագործած է:



Ամերիկացի պաշտօնատար մը խօսեցաւ Միացեալ Նահանգներու արտաքին գործոց նախարարութեան պաշտօնէաները 24 ժամուան մէջ հեռացնելու մասին:

Սպիտակ տան բանբեր Սառա Սանտրըզ հաղորդագրութիւն մը հրապարակելով յայտնեց, որ Միացեալ Նահանգներ Սուրիոյ մէջ պարտութեան մատնած են ՏԱՀԵՇ-ը, սակայն այդ իրողութիւնը չ'ազդեր Միջազգային դաշինքին կամ ՏԱՀԵՇ-ի դէմ անոր պայքարին վրայ:

«Ամերիկեան ուժերը սկսանք վերադարձնել մեր երկիր՝ (ՏԱՀԵՇ-ի դէմ) արշաւի երկրորդ երեսի ծիրին մէջ», ըսաւ ան՝ աւելցնելով, որ Միացեալ Նահանգներն ու անոնց դաշնակիցները պատրաստ են բոլոր մակարդակներուն վրայ աշխատելու ամերիկեան շահերը պաշտպանելու համար՝ հոն ուր պէտք է՝ ընդգծելով, որ միացեալ աշխատանքը կը շարունակուի ծայրայեղ իսլամական ահաբեկիչները հաստատման վայրէ, ինքնաֆինանսաւորումէ ու աջակցութենէ, ինչպէս նաեւ մեր սահմանները կտրելու որեւէ միջոցէ զրկելու համար:

Ամերիկացի պաշտօնատար մը յայտնեց, որ ամերիկեան ուժերը Սուրիայէն պիտի հեռանան, երբ ՏԱՀԵՇ-ի դէմ գործողութեան վերջին փուլը աւարտի, եւ կը նախատեսուի, որ Սուրիայէն հեռացումը տեղի ունենայ 60-100 օրէն:

«Նիւ Եորք Թայմզ» օրաթերթը հաղորդեց, որ Սուրիայէն հեռանալու պաշտօնական որոշումը կրնայ այսօր (Չորեքշաբթի օր, «Ա.») որդեգրուիլ, սակայն Փենթակոնի ղեկավարութիւնը կը փորձէ Թրամփը տարհամոզել: Վերջինս իր զինուորական ղեկավարութիւնը զգուշացուցած է հիւսիսային Սուրիա թրքական ներխուժումին ամերիկեան ուժերուն համար ներկայացուցած վտանգէն:

Մարդկային իրաւանց սուրիական դիտարանը հաղորդեց, որ քրտական ղեկավարութեամբ Սուրիոյ ժողովրդավարական ուժերը արեւելեան Սուրիայէն հեռանալու ամերիկեան անակնկալ քայլը կը նկատեն «թիկունքէն դաշոյնի հարուած մը»:

www.aztagdaily.com

Միացեալ Նահանգներու Արտաքին Գործոց Նախարարութիւնը Հաւանութիւն Տուաւ Թուրքիոյ «Փաթրիոթ»-ներ Վաճառելուն

Միացեալ Նահանգներու արտաքին գործոց նախարարութիւնը հաւանութիւն տուած է Թուրքիոյ՝ ամերիկեան «Փաթրիոթ» հակաօդային պաշտպանութեան համակարգեր վաճառելու առաջարկին: Այս մասին կը հաղորդէ «Նիւ Եորք Թայմզ» օրաթերթը:

Թուրքիոյ իշխանութիւնները տասը տարի շարունակ Միացեալ Նահանգներէն արտօնութիւն կը խնդրէին այդպիսի չորս համակարգ գնելու համար:

Այժմ Միացեալ Նահանգներու արտաքին գործոց նախարարութիւնը հաւանութիւն տուած է 3,5 միլիարտ տոլար արժողութեամբ գործարքին:

Ամերիկեան իշխանութիւնները նշած են, որ այս համակարգերը Թուրքիոյ կարելիութիւն պիտի ընձեռնեն պաշտպանելու իր տարածքային ամբողջականութիւնը եւ զսպելու շրջանային սպառնալիքները:

Յիշեցնենք, որ թուրք-ամերիկեան յարաբերութիւններուն մէջ լարուածութիւն գոյութիւն ունի Թուրքիոյ կողմէ ռուսական «Էս-400» հակաօդային պաշտպանութեան համակարգեր գնելու գործարքին պատճառով: Ուաշինկթըն բուռն կերպով կ'ընդդիմանայ այդ գործարքին:

ՄԱԿ-ի Ապահովութեան Խորհուրդին Մէջ Հանդիպում՝ Քոսովոյի Եւ Սերպիոյ Ղեկավարներուն Միջեւ



Քոսովոյի խորհրդարանին կողմէ զինեալ ուժերը լիարժէք բանակ դարձնելու որոշումի որդեգրումէն քանի մը օր ետք, Քոսովոյի եւ Սերպիոյ նախագահները հանդիպում ունեցած են ՄԱԿ-ի Ապահովութեան Խորհուրդին մէջ: Այս մասին կը հաղորդէ «Ազատութիւն» ձայնասփիւռի կայանը:

Քոսովոյի խորհրդարանի քայլը դժգոհութիւն յառաջացուցած է Քոսովոյի սերպերուն մօտ,

ինչպէս նաեւ Պելկրատի մէջ, ՕԹԱՆ-էն ալ զգուշացում կատարուած է այդ գծով:

Քոսովոյի նախագահ Հաշիմ Թաչի օրեր առաջ յայտարարած է, թէ Քոսովոյի որոշումը՝ թեթեւ զինեալ անվտանգութեան ուժերը լիարժէք բանակ դարձնելու վերաբերեալ, անշրջելի է:

14 Դեկտեմբերին Քոսովոյի խորհրդարանը ձայներու ճնշող մեծամասնութեամբ քուէարկեց 2500 զինեալներէ բաղկացած անվտանգութեան ուժերը վերածելու շուրջ 5000 զինուորներով բանակի:

Ուաշինկթրն Չի Ձգտիր Ասատը Իշխանութենէն Հեռացնել

Ճեֆրի Կը Ձգուշացնէ Թուրքիան Հիւսիսային Սուրիոյ Մէջ Չինուորական Գործողութիւն Շղթայազերծելէ

Սուրիոյ հարցով Միացեալ Նահանգներու յատուկ պատուիրակ Ճեյմս Ճեֆրի յայտարարեց, թէ իր երկիրը «չի ձգտիր Սուրիոյ նախագահ Պաշար Ասատը իշխանութենէն հեռացնել, սակայն նոյն ատեն Սուրիոյ վերաշինութիւնը պիտի չֆինանսաւորէ, եթէ վարչակարգը խորքային փոփոխութեան չենթարկուի»:

Ան յայտնեց, որ Սուրիոյ վերաշինութիւնը պիտի կարօտի 300-400 միլիառ տոլարի: Անոր կարծիքով՝ Արեւմուտքն ու միջազգային կառոյցները ելեւմտական օժանդակութիւն պիտի չտրամադրեն, եթէ երկրի իշխանութիւններուն վարած քաղաքական ուղեգիծը չփոխուի:

Ճեֆրի զգուշացուց, որ «Թուրքիոյ կամ որեւէ այլ ուժի կողմէ հիւսիսարեւելեան Սուրիոյ դէմ զինուորական յարձակում մը վատ գաղափար մը պիտի ըլլայ»՝ աւելցնելով. «Մենք նաեւ կը հասկնանք, թէ թուրքերը մտահոգ են այդտեղի ապահովական կացութենէն, այդ մտահոգութիւնը նկատի կ'առնենք եւ անոնց հետ կ'աշխատինք»:

Ամերիկացի պաշտօնատարը նաեւ բացայայտեց. «Անցեալ Կիրակի հարիւր Փեշմերկաներ հիւսիսային Իրաքէն փոխադրուեցան Սուրիա: Այդ քայլը կատարուեցաւ ամերիկեան օրհնութեամբ եւ Սուրիոյ ժողովրդավարական ուժերուն համաձայնութեամբ»:

Բացի ստկէ, ան կոչ ուղղեց իրանեան ուժերը հեռացնելու Սուրիայէն: Միւս կողմէ, Թուրքիոյ պաշտպանութեան նախարար Հուլուսի Աքար յայտնեց. «Ուաշինկթրն չարգեց իր խոստումները, մասնաւորաբար ՔԱԿ-ը Մընպեթէն դուրս բերելու գծով: Այդ կազմակերպութիւնը կը շարունակէ իրամատնէր փորել եւ պատուարներ բարձրացնել»:

«Անգարան պիտի չարտօնէ, որ հիւսիսային Իրաքի Սինճար գաւառը Կորդուաց լեռներուն նման ահաբեկիչներու որջի վերածուի», ըսաւ ան:

Թուրքիոյ պաշտպանութեան նախարարը նաեւ յայտնեց, որ իր երկիրը վճռական է զայն ներքին ու արտաքին ճակատի վրայ վտանգոյ ահաբեկչական կազմակերպութիւններուն դէմ պայքարելու առումով՝ շեշտելով, որ Թուրքիան կը յարգէ «Իրաքի եւ Սուրիոյ մէջ քաղաքական միութիւնն ու հողային ամբողջականութիւնը»: Մինչ այդ, Թեհրան յայտարարեց. «Սուրիոյ մէջ թրքական զինուորական որեւէ գործողութիւն, որ առանց Դամասկոսի հետ համակարգումի կը կատարուի, պիտի ազդէ Ասթանայի բանակցութիւններու արդիւնքներուն վրայ»:

Իրանի արտաքին գործոց նախարարութեան բանբեր Պահրամ Ղասեմի շեշտեց. «Որեւէ երկիր չի կրնար Սուրիոյ մէջ որեւէ քայլի դիմել՝ առանց Դամասկոսի հետ համակարգում կատարելու»: Յիշեցնենք, որ Թուրքիոյ նախագահ Ռեճեփ Թայիփ Էրտողան երկուշաբթի օր յայտարարած էր, թէ «որեւէ պահու կրնանք Եփրատի արեւելեան ափին վրայ գտնուող ահաբեկիչներուն դէմ յարձակում գործել»՝ աւելցնելով. «Սուրիոյ մէջ սպասուող գործողութիւնը քննարկեցի Թրամփի հետ, եւ անոր պատասխանը դրական էր»:

ԱՆՂԱՐԱՐ

Եթե չըլլար ԼԵՄ-ը...

Մտածուած է արդեօք, թէ ի՞նչ կրնար ըլլալ լիբանանահայութեան դիմագիծը յատկապէս եւ հայ կեանքի պատկերը ընդհանրապէս՝ առանց Հ.Յ.Դ. Լիբանանի Երիտասարդական Միութեան:

Փորձ կատարուած է հաշուելու թիւը անոնց, որոնք ԼԵՄ-ի շարքերէն անցնելով՝ վերջին կէտ դարուն թարմ շունչ ու աւին տուին Դաշնակցութեան, թափ ու կշիռ՝ Հայ Դատի ի խնդիր անոր մղած պայքարներուն:

45 տարին բաւարար ժամանակ է գնահատական տալու միութեան մը, որուն տարիներէն իւրաքանչիւրը 45 անգամ 45 ջանք, գործ ու նուիրում եղաւ զինք ծնող գաղութին եւ կուսակցութեան: Հազարաւորներ անցան ԼԵՄ-ի շարքերէն, հարիւրաւորներ իրենց հետքն ու անունը ձգեցին, իսկ տասնեակներ հասան մինչեւ հայութեան գերագոյն նուիրաբերումի զոհասեղանը:

Լիբանանի Երիտասարդական Միութիւնը, աւելի ծանօթ՝ յապաւուած ԼԵՄ անունով, ամէնէն առաջ եղաւ ազգային-կուսակցական դաստիարակութեան դպրոց մը, ուր մուտք գործողները սորվեցան երիտասարդական իրենց խանդը ծառայեցնել հաւաքական կազմակերպ աշխատանքի եւ ազգային նպատակասլաց կեանքի: ԼԵՄ-ի միջավայրը միայն գիտելիքներ չփոխանցեց իրեն դիմողներուն, այլ հոգիներ դարբնեց ու միտքեր պատրաստեց քաղաքականացման եւ յեղափոխականացման իտեղանքով: Այնպէս մը որ, մարդիկ երբ ԼԵՄ-ականներ տեսան նոյնիսկ ակումբներէ դուրս, առանց պարտականութեան, իրենց խօսքերէն ու կեցուածքներէն դատելով, գիտցան թէ ԼԵՄ-ականներ են անոնք:

Դիւրին չեղաւ ԼԵՄ-ի 45-ամեայ երթը, տեւական պայքար մը եղաւ ան ընդհանուր անտարբերութեան, երիտասարդութեան ապաքաղաքականացման, ազգային, հոգեւոր ու մտաւոր արժէքներէ օտարացման հոսանքներուն դէմ: Ընկրկողներ միշտ եղան, բայց երթը շարունակուեցաւ, որովհետեւ ԼԵՄ-ի կազմակերպական հնոցը շարունակ հասցուց պատրաստուած ու պատրաստակամ նոր ուժեր:

Լիբանանի քաղաքացիական պատերազմը շատ բան խանգարեց ԼԵՄ-ի ծրագիրներէն, բայց անոր անդամներուն տուաւ պատերազմի երկար տարիներուն իրարու մօտ ըլլալու եւ իրարմով զօրանալու բացառիկ ուժը: Այդ տարիներուն քանի մը սերունդ հասակ առաւ ծառայութեամբ եւ նուիրումով մեծնալու դաշնակցական աւանդով:

«Եարի փոխան զէնք գրկած» ԼԵՄ-ական տղաք ակումբներու մէջ յաճախ 24 ժամ միասին անցուցին, գիշերը-ցերեկին խառնեցին եւ ստեղծեցին ընկերական-կուսակցական կեանքի նախանձեղի մթնոլորտ մը, որ բնորոշ եղաւ «պահակ տղոց» առօրեային:

15 տարի շարունակ հայաբնակ թաղամասերու ակումբները ապրեցան մնայուն եռուզեռը ԼԵՄ-ականներուն. ժողովներ, ձեռնարկներ, օրացոյցի եւ «Ռազմիկ»ի վաճառքներ, կոչերու եւ որմագոյներու ցրումներ, թաղային հարցերու դասաւորումներ, շրջանի ապահովութեան կապուած աշխատանքներ երկա ը ժամեր խլեցին բոլորէն, եւ սակայն բոլորը, մեծ թէ պզտիկ,

անտրտունջ, սիրով եւ համբերատարութեամբ կատարեցին իրենց վստահուած պարտականութիւնները:

Օրերու հետ գործի դաշտերը ընդլայնեցան, ԼԵՄ-ի շարքերն ալ ստուարացան: Հայութեան գոյատեւման եւ Հայ Դատի հետապնդման մարտահրաւիրները թելադրեցին աւելի աշաւուրջ եւ կազմակերպ մասնակցութիւն ազգային մեր կեանքին: Հայ Դատը դարձաւ գլխաւոր մտասուեռումը բոլորին: «Պահակ տողոց» շարքերէն դարբնուեցան գաղափարի մարտիկներ եւ Հայ Դատի զինուորեալներ: Շատերը անոնցմէ հոմանիշ դարձան գերագոյն զոհաբերութեան, ուրիշներ իրենց կեանքը մաշեցուցին նուիրումի ճամբուն վրայ, իսկ գտնուեցան նաեւ անոնք, որոնք Յարատեւ կռիւր վերածեցին ամենօրեայ պայքարի. ընդդիմացա՛ն թրքախօսութեան երեւոյթին դէմ, հրկիզեցին թրքերէն ձայներիզներն ու վիտեօ-երիզները, «ո՛չ» ըսին թրքական ապրանքներու վաճառքին եւ հակաթուրք քարոզչական ձեռնարկներ կազմակերպեցին երկա՛ր տարիներ:

Այսպէս, գաղութին մէջ իր ազդու ներկայութեամբ ԼԵՄ-ը ունեցաւ տեւական ըսելիք եւ ընելիք: Դիմագիծ կերտեց ան, նկարագիր ունեցաւ եւ առաքելութեան մը յառաջապահը եղաւ:

Արցախեան պահանջատիրութիւնը եւ Հայաստանի անկախացումը նոր հորիզոններ բացին ԼԵՄ-ին առջեւ: ԼԵՄ-ականներ շուտով անդրադարձան, որ հարցը լոկ թաղամասի մը կամ գաղութի մը պաշտպանութիւնը չէ, այլ՝ ամբողջ հայրենիքի մը, որուն արեւելեան սահմանին վրայ կենաց մահու կռիւ կը մղուի, արեւմուտքը ենթակայ է շրջափակումի, իսկ հիւսիսը կը հիւծի իր խոր վերքով: ԼԵՄ-ը հասաւ ամենուրեք. տեղ մը իբրեւ ազատամարտիկ, այլ տեղ իբրեւ բազմաձակատ պայքարի մասնակից, մէկ ուրիշ տեղ՝ իբրեւ «Անոյշ հայրենիք» ճամբարներու կազմակերպիչ: Միաժամանակ ան ձեռք ձգեց թանկագին դաս մը, որ հայրենիքին համար մեռնելու պատրաստ եղող երիտասարդութիւն մը պէտք է պատրաստ ըլլայ նաեւ հայրենիքին համար ապրելու:

45-ամեակ է այս տարի: ԼԵՄ-ը յոբելենական տարին կը բոլորէ վերանորոգման եւ վերակազմակերպման մարտահրաւիրներով: Շատ արագ զարգացող այսօրուան աշխարհին մէջ ոչ ոքի արտօնուած է այլեւս տեղքայլ ընել: Համաշխարհայնացումի եւ մրցակցութեան դարն է: Հետեւաբար, ժամանակին հետ քայլ պահելու պարտաւորութիւնը, ինքզինք կատարելագործելու կամքը եւ աշխատանքի նորանոր դաշտերու որոնումը կը պայմանաւորեն ԼԵՄ-ի զարգացումը յառաջիկայ տարիներուն:

Ճիշդ է, անցեալին բաղդատմամբ՝ մեր օրերուն մեծ է թիւը այն երիտասարդութեան, որ հետզհետէ քիչ մը աւելի կը հրաժարի իր հողէն, անցեալէն, վերադարձի երազէն եւ պահանջատիրութենէն: Դժբախտաբար, մեծ է թիւը նաեւ ԼԵՄ-ի բնականոն գործունէութիւնը խոչընդոտող դժուարութիւններուն: Սակայն ե՛րբ բարենպաստ պայմաններ ստեղծուած են հայութեան համար: Դաշնակցական ո՞ր սերունդը ունեցած է անկախ Հայաստանի ու Արցախի դրօշներուն տակ գործելու այն բախտն ու առիթը, զոր ընձեռուած է այսօրուան սերունդին:

Ընդհակառակն, պետականութեան կորուստի երկար ժամանակներուն, երիտասարդութիւնը ընդհանրապէս տարտղնուած եւ իր սեփական կամքին գերին դարձած է, սակայն միշտ ալ գտնուած են «խենթ»եր, որոնք կարողացած են յաղթահարել իրենց ժամանակի ու միջավայրի աննպաստ պայմանները: Իսկ ո՞ւր են այսօրուան «խենթ»երը, որոնք հաւաքական մեր

թերացումներուն համար դժգոհելու փոխարէն՝ քաջութիւնը պիտի ունենան տէր կանգնելու իրենց պարտականութիւններուն՝ հանդէպ իրենց ժողովուրդին, կուսակցութեան, իրենց նախորդող ու յաջորդող սերունդներուն:

45-ամեակը նոր էջ կը բանայ ԼԵՄ-ի պատմութեան մէջ: Իրատեսութիւնը կը թելադրէ պատրաստ ըլլալ աւելի ծանր պայմաններու մէջ գործելու: Երեւոյթները ցոյց կու տան, որ այսուհետեւ դժուարութիւնները պիտի ըլլան շատ աւելի, սակայն անոնք պէտք չէ վախցնեն կամ ընկճեն երիտասարդութիւնը, այլ՝ յաւելեալ համբերութիւն ներշնչեն անոր, համբերութիւնը՝ փորձառութիւն, իսկ փորձառութիւնը՝ վճռականութիւն: Անտարբերութիւնը եւ յուսահատութիւնը խորթ են յանձնառու երիտասարդութեան նկարագիրին: Դաշնակցականութիւնը կը թելադրէ տեսական ճիգ, յարատեւութիւն եւ տքնանք:

Անցնող 45 տարիներուն, ԼԵՄ-ականներ հանգիստի, ժամանակի եւ արեան զոհաբերութեամբ յաջողեցան բարձր բռնել գաղափարական այն դրօշը, որ հայութիւնը պիտի առաջնորդէ իր անկատար տենչերուն իրականացման: Ներկան իր ներշնչումը կրնայ առնել անցեալէն եւ ամուր պատուանդանը ըլլալ վաղուան նոր 45-ամեակներուն, եթէ ամէն բանէ առաջ բոլորը, անխտի՛ր բոլորը, անդրադառնան, թէ ի՞նչ կրնար ըլլալ մեր կեանքը առանց ԼԵՄ-ին...:


ՎԻԳԷՆ ԱՄԱԳԵԱՆ

Ծննդեան 90-ամեակ Եւ Մահուան 20-ամեակ

Հայութեան եւ Հայ դատի հաւատարիմ զինուոր հանդիսացած Հրայր Մարութեանի 90-ամեակն է այսօր՝ 19 Դեկտեմբերին, իսկ քանի մը օր ետք՝ 21 Դեկտեմբերին, կ'ամբողջանայ անոր մահուան 20-ամեակը:

Ան եղաւ հայ իրականութեան մէջ կարեւոր դերակատարութիւն եւ ներդրում ունեցած ղեկավար մը, որ դաշնակցականի իր յանդուգն կամքով ու աներեր հաւատքով պայքարի ուղին բացաւ, ամրապնդեց հաւաքական կամքը ո՛չ միայն Դաշնակցութեան, այլեւ համայն հայութեան շարքերուն մէջ:

Աւելի քան 25 տարի վարեց ՀՅԴ Բիւրոյի ներկայացուցիչի բարձրագոյն պատասխանատուութիւնը՝ այսպիսով տիրանալով հայ ժողովուրդի ազգային արժանաւոր ղեկավարի դասին պատկանին:



Այս մեծ անձնաւորութեան կեանքին ու տարած մեծ աշխատանքին կ'անդրադառնանք իր մահուան օրը՝ 21 Դեկտեմբերի մեր էջերով:

«Ա.»

www.azator.gr

ՄԱՆԿԱՎԱՐԺԻՆ ԱՆԿԻՒՆԸ

ՓՈՔՐԻԿԸ ՊԷՏՔ Է ՀԱԻԱՏԱՅ ԿԱՂԱՆԴ ՊԱՊՈՒԿԻ ԱՌԱՍՊԵԼԻՆ



Փոքրիկներուն մեծամասնությունը կը հաւատայ կաղանդ պապուկի գոյութեան: Սակայն միակ տարբերությունը պատմութեան ներկայացման ձեւն է:

Խելացի փոքրիկը չի կրնար դիւրութեամբ ընդունիլ այն գաղափարը, թէ ինչպէս բարի ծերունին կաղանդի գիշերը իւրաքանչիւր փոքրիկի գաղտնաբար կը հասցնէ նուէրը. նոյնիսկ եթէ ան հաւատայ, հետագային պիտի գիտակցի, թէ այդպիսի անձ գոյութիւն չունի, այսպիսով ան կը կորսնցնէ իր ծնողքին հանդէպ վստահությունը:

Երբեմն ծնողքներ կ'օգտագործեն կաղանդ պապան որպէս միջոց դաստիարակելու իրենց զաւակը: Անոնք կը նշեն, թէ կաղանդ պապան պիտի բարկանայ եթէ ան անքաղաքավար վերաբեմունք ցուցաբերէ, հետեւաբար պապուկը պիտի վարանի նուէր բերելէ: Այսպիսով կաղանդ պապան կը դառնայ դատախազ: Նման ընտանիքներու զաւակները կը հաւատան, թէ կաղանդ պապան խիստ անձնաւորութեան տէր անձ մըն է, ինչպէս ծնողքը նկարագրած էր: Փոքրիկը միշտ ալ կ'ընդունի թէ իր ծնողքին խօսքը ճշգրիտ է:

Ծնողք մը, երբ կը խօսի կաղանդ պապային մասին, հարկաւոր է որ առասպելի ձեւով ներկայացնէ, մատնանշելով, թէ այս պատմությունը իրականութենէն հեռու կը մնայ: Ծնողք մը կը սխալի, երբ փոքրիկին մօտ վախ յառաջացնելով կը համոզէ, թէ կաղանդ պապան իրական անձնաւորութիւն մըն է, կը հետաքրքրուի փոքրիկներով եւ անոր հիման վրայ նուէրներ կը բերէ եւ կամ ի հակին կը գրկէ զանոնք: Այս վախը փոքրիկին մէջ կը յառաջացնէ մտահոգություն:



Երեք կամ չորս տարեկան փոքրիկը չի զանազաներ իրականութեան ու երեւակայութեան միջեւ: Ան, թէև հետաքրքրութեամբ կը լսէ պատմությունը, սակայն միեւնոյն ժամանակ կը գիտակցի անոր երեւակայական հանգոյցին: Ան կը հաւատայ այն պատմություններուն, որոնց կ'ուզէ ինք հաւատալ:

Սակայն երբ հինգ տարեկան փոքրիկը կը հարցնէ. «Կաղանդ Պապան գոյութիւն ունի՞», ծնողքը պետք չէ ստէ, այլ պատասխանէ. «Ենթադէնք թէ ոչ, բայց կ'ուզեմ երեւակայել թէ գոյութիւն ունի»:

Պետք է փոքրիկին սորվեցնել, թէ կաղանդին հիմնական նպատակը սերն ու ուրախությունն է եւ ոչ թէ նուէր ստանալը, թէ ոչ փոքրիկը անհամբեր պիտի սպասէ կաղանդը եւ անոր մօտ պիտի զարգանայ անձնասիրությունն ու ազահությունը: Միեւնոյն ժամանակ պետք չէ նեղանալ փոքրիկէն, երբ փափաք կը յայտնէ նուէր ստանալու, գիտակցելով, թէ այս փափաքը բնական է հիմնական է անոնց մօտ, սակայն առանց չափազանցութեան: Նախընտրելի է նաեւ քաջալերել փոքրիկները պզտիկ նուէրներ եւ կամ կաղանդի բացիկներ պատրաստելու: Երեք տարեկան փոքրիկը արդէն կարողութիւն ունի թուղթ կտրելու կամ փակցնելու, հետեւաբար կրնայ շնորհաւորական տոմսեր պատրաստել:

Հոգեւոր եւ կրօնական ըմբռումները ծնողներէն կը փոխանցուին զաւակներուն: Ծնողներուն մեծամասնությունը կ'ընդունի, թէ կաղանդը այն գիշերն է, երբ ներկաները սեր եւ առատաձեռնություն կը ցուցաբերեն ուրիշներուն նկատմամբ, հետեւաբար, ընդօրինակելով իր ծնողքին վարքը, երեք տարեկան փոքրիկը այս տարիքին կը սկսի զարգացնել սիրոյ զգացումներ:

Պէթի Քիլերճեան

www.aztarar.com

ԼՈՒՐԵՐ ԳԱՂՈՒԹՆԵՐԷՆ

Կիլիկիոյ Կաթողիկոսութեան Թեմի 60-ամեակին Եւ Արեւմտեան Թեմի 45-ամեակին Նուիրուած Պատարագ

9 Դեկտեմբերին Կլենտլի Ս. Աստուածածին եկեղեցոյ մէջ մատուցուեցաւ ս. պատարագ՝ Հիւսիսային Ամերիկայի մէջ Կիլիկեան կաթողիկոսութեան հովանին վայելող թեմի



հաստատման 60-ամեակին եւ Արեւմտեան թեմի 45-ամեակին զոյգ յոբելեաններուն առիթով:

Արեւմտեան թեմի առաջնորդ Մուշեղ արք. Մարտիրոսեանին պատգամը կեդրոնացած էր պատմական այս փուլին ու ապագայի տեսլականին վրայ: Ան առաջին հերթին փառք տուաւ Աստուծոյ, որ իրեն առիթը շնորհած է յոբելեական այս առիթով պատարագ մատուցելու: Ան աղօթք բարձրացուց թեմի հոգեւորական եւ աշխարհական նուիրեալ բոլոր ննջեցեալներուն յիշատակին: Սրբազանը յարգանքով ու երախտագիտութեամբ յիշեց ամերիկեան այս ավերտուն անցեալ տասնամեակներուն մատուցուած ծառայութիւնները եւ զանոնք նկատեց Քրիստոսի պատգամին կիրարկումը, այսինքն հասնիլ ժողովուրդի կարիքներուն՝ ծառայելով նաեւ հայրենիքին, այն հասկացութեամբ, որ եկեղեցին ու ժողովուրդը մէկ ամբողջութիւն կը կազմեն: Սրբազանը կոչ ուղղեց բոլորին միասնական ճիգերով ու սերտ գործակցութեան ոգիով, հաւատքով եւ յոյսով նայելու ապագային՝ պայծառացնելու համար մեր եկեղեցոյ, հայրենիքին ու ժողովուրդին կեանքը:

Պատարագի աւարտին տեղի ունեցաւ հոգեհանգստեան պաշտօն՝ երկրաշարժի զոհերուն ու թեմական կեանքին նուիրեալ հոգեւորականներու ու աշխարհականներու յիշատակին:

Հայ Ուսանողական «Չհարմահալ» Միութեան 88-ամեակին Նուիրուած Ձեռնարկ

Նախաձեռնութեամբ Հայ ուսանողական «Չհարմահալ» միութեան Նոր Զուղայի մասնաճիւղի վարչութեան եւ համագործակցութեամբ գրական միաւորին ու ձեռնարկային յանձնախումբին, վերջերս մասնաճիւղի կեդրոնատեղիին մէջ տեղի ունեցաւ միութեան հիմնադրութեան 88-ամեակին նուիրուած ձեռնարկ:

Գրական միաւորի անդամ, օրուան հանդիսավար Նորա Շահիջանեանը արտասանեց Չհարմահալ գաւառի բարբառով սիրային քառեակներ, ապա անդրադարձաւ միութեան հիմնադիր սերունդին եւ պատմեց գաւառի պատմութեան հետաքրքրական դրուագներուն եւ



աւանդոյթներուն մասին:

Մասնաճիւղի վարչութեան նախագահ Յովակ Յարութիւնեանը իր խօսքին մէջ շեշտեց, որ մասնաճիւղին հիմնադրութիւնը կը նպատակադրէր գաւառի կրթական գործի բարելաւումը:

Ձեռնարկին ընթացքին գործադրուեցաւ գեղարուեստական յայտագիր:

«Մանթա Լուչիա»-ի Արարողութիւն-Հանդիսութեան

12 Դեկտեմբերին թեմի կաթողիկոսական փոխանորդ Խորէն արք. Տողրամաճեանը ընդառաջելով Կիպրոսի մէջ Շուէտի դեսպան Աննա Օլսըն Վրանկի պաշտօնական հրաւերին՝ ներկայ գտնուեցաւ դեսպանութեան մէջ կազմակերպուած, Շուէտի աւանդութեան համաձայն, «Մանթա Լուչիա»-ի արարողութիւն-հանդիսութեան, փոքրերու տողանցքին, գեղարուեստական յայտագրին ու ընդունելութեան:

Դեսպան Աննա Օլսըն Վրանկը բարի գալուստ մաղթելէ ետք ներկաներուն, բացատրեց օրուան սօսին իմաստն ու նշանակութիւնը, ի մասնաւորի՝ շուէտացի ժողովուրդին համար: Տօնակատարութիւնը յառաջ եկած է վանականներու կողմէ, որոնք առաջին անգամ

քրիստոնեությունը քարոզած են Շուկտի մեջ: Սրբուհի Լուչիան երիտասարդ աղջիկ մըն էր, որ իր հաւատքին պատճառով նահատակուած էր 304 թուականին: Տօնը կը նշուի 13 Դեկտեմբերին, որ սկիզբը կը նկատուի Կաղանդի տօնակատարութեանց: Իսկ տօնին յոյսի խորհուրդը իրեն հետ կը բերէ յոյսն ու լուսաւորումը՝ տարուան մութ ու խաւար օրերուն:



Ապա ներկաները ականատես եղան փոքրիկ աղջնակներու մումերով տողացքին, որմէ ետք Նիկոսիոյ Ս. Աստուածածին եկեղեցոյ կրտսերներու երգչախումբը մեկնաբանեց երգերու փունջ մը՝ հայերէն, շուկտերէն, յունարէն եւ անգլերէն լեզուներով, խմբավարութեամբ Վիքի Գոյումճեանի եւ դաշնակի ընկերակցութեամբ Նառա Մարդարեանի:

Հանդիսութեան եւ ընդունելութեան ընթացքին սրբազանը կիպրահայ գաղութին անունով շնորհաւորեց ու բարեմաղթութիւններ կատարեց դեսպանին եւ պատեհութիւնը ունեցաւ զրուցելու կրօնապետներու, դեսպաններու եւ այլ պաշտօնական անձերու հետ, միեւնոյն ժամանակ շնորհաւորութիւններ ստանալով բոլորէն՝ եկեղեցոյ կրտսերներու երգչախումբի բացառիկ ու տպաւորիչ ելոյթին համար:

Ազգային Օրուան Առիթով Ընդունելութիւն-Հիւրասիրութիւն



11 Դեկտեմբերին թեմի կաթողիկոսական փոխանորդ Խորէն արք. Տողրամաճեանը եւ Նիկոսիոյ հովիւ Մովսիկ քիւյ. Հապէշեանը, ընդառաջելով Քաթարի դեսպան Սուլթան Իպրահիմ Մահմուտի պաշտօնական հրաւերին, ներկայ գտնուեցան երկրի ազգային օրուան առիթով կազմակերպուած ընդունելութիւն-հիւրասիրութեան՝ «Հիլթըն Փարք» պանդոկին մէջ:

Ելոյթ ունեցան դեսպան Սուլթան Իպրահիմ Մահմուտ եւ Կիպրոսի ուժանիւթի նախարար Տիմիթրիս Լաքոթրիտիս:

Հանդիսութեան ներկայ էին խորհրդարանի նախագահը, փոխադրամիջոցներու նախարարը, քրիստոնեայ եւ իսլամ կրօնապետներ, դեսպաններ, քաղաքական եւ զինուորական անձնակազմներ ու հրաւիրեալներ: Հանդիսութեան ընթացքին սրբազանը եւ քահանայ հայրը կիպրահայ գաղութին անունով բարեմաղթութիւններ յայտնեցին դեսպանին եւ անոր ընդմէջէն՝ պետութեան: Անոնք պատեհութիւնը ունեցան նաեւ զրուցելու խորհրդարանի նախագահին, նախարարներու եւ զանազան երկիրներու դեսպաններու հետ: Հրաժեշտի պահուն բոլորն ալ յատուկ յուշանուէրներ ստացան դեսպանութեան կողմէ:

ԱՅԼԱԶԱՆ

Գիտե՞ք Յարմար Նուէրներ Գնել

Կաղանդի նախօրեակին շատերու մղձաւանջն է նուէրի ընտրութիւնը: Իսկ դո՞ւք, արդէօք դժուարութիւն կ'ունենա՞ք նուէրի ընտրութեան ատեն, ձեզի համար ի՞նչն է առաջնահերթը՝ նուէրին գործնական եւ օգտակար ըլլալը, դաստիարակի չ ըլլալը, թէ՞ ստացողին համար անսպասելի ըլլալը... Պատասխանեցէք այս փորձ-հարցարանին եւ իմացէք պատասխանը:

- 1 -

Լաւ Նուէր Մը Գնելու Համար՝

- ա.- Օրուան ձեր տրամադրութենէն կախեալ է. կը ներշնչուիք ու կը գնէք:
- բ.- Կը փնտռէք գործնական եւ օգտակար նուէր մը:
- գ.- Խնդրոյ առարկայ անձին կը դիմէք, որպէսզի անոր ճաշակին յարմարող բան մը գնէք:

- 2 -

Ամանորը Կը Մօտենայ, Նուէրներու Գծով՝

- ա.- Արդէն մեծ մասը գնած էք:
- բ.- Տակաւին շուկայ իջնելու առիթ չէք ունեցած:
- գ.- Բոլոր նուէրները գնած ու ծրարած էք:

- 3 -



Կաղանդի Նուէրներուն Համար՝

- ա.- Յատուկ պիտձէ մը չէք ճշդած եւ վերջին նուէրին դրամը կը պակսի...
- բ.- Մօտաւոր պիտձէ մը ճշդած էք:
- գ.- Յստակ պիտձէ մը ճշդած էք եւ անկէ չէք կրնար շեղիլ:

- 4 -

Կ'որոշէք Ձեր Ընկերուհիին Համար Գնել Այս Գեղեցիկ Շապիկը.

- ա.- Անոր չափը չէք գիտեր, աչքի չափով կը գնէք:
- բ.- Վաճառող օրիորդին կարծիքը կ'առնէք:
- գ.- Վստահ էք, որ թէ՛ չափը եւ թէ՛ գոյնը պահանջուածն է:

- 5 -

Երբ Անելի Առջև Գտնուիք

- ա.- Անուշահոտ կը նուիրէք:
- բ.- Գիրք կը նուիրէք:
- գ.- Դրամ կը նուիրէք:

- 6 -

Ձեր Կարծիքով, Հաճոյք Պատճառող Նուէրը Այն Է, Որ՝

- ա.- Մեծ սիրով եւ գուրգուրանքով ընտրեցիք:
- բ.- Ամէն բանէ առաջ օգտակար է:
- գ.- Անսովոր է եւ ստացողին միտքէն չ'անցնիր:

- 7 -

Կադանդին Բան Մը Նուիրելը Ձեզի Համար՝

- ա.- Անխուսափելի պարտականութիւն մըն է:
- բ.- Հաճելի, բայց յոգնեցուցիչ է:
- գ.- Հաճոյք է:

- 8 -

Ձեր Կարծիքով, Մեծ Սխալ Է՝

- ա.- Հրահան նուիրել չծխող անձին:
- բ.- Խմիչք նուիրել յղի կնոջ մը:
- գ.- Տուրմ նուիրել սննդականոնի հետեւող անձին:

- 9 -

Ձեր Զարմուհին Մարզանք Շատ Կը Սիրէ, Կ'որոշէք՝

- ա.- Մարզանքի վերաբերող տեսերիզ մը նուիրել:
- բ.- Մարզանքի յատուկ զգեստ մը նուիրել:
- գ.- Մարզանքի դասընթացքի կտրօն մը նուիրել:

- 10 -

Դուք Շատ Պիտի Գնահատէք՝

- ա.- Թանկարժեք նուէր մը:
- բ.- Անսովոր նուէր մը:
- գ.- Ձեռքով պատրաստուած նուէր մը:

Արդիւնք

Ձեր կէտերը հաշուեցէք հետեւեալ ձեւով. 1 կէտ «ա» պատասխանին համար, 2 կէտ՝ «բ»-ին եւ 3 կէտ՝ «գ»-ին:

«Եթէ 10-15 կէտ հաւաքեցիք, նուէր գնելը ձեզի համար բաւական մեծ տաղտուկ է: Յաճախ սխալ ընտրութիւններ կ'ընէք եւ վերջին պահուն կը ձգէք այս կարեւոր գործը: Տակաւին ուշ չէ, ժամանակն է, որ փոխէք ձեր ընթացքը:

Եթէ 16-23 կէտ հաւաքեցիք՝ նուէր փնտռելն ու նուիրելը մեծ հաճոյք են ձեզի համար: Երանի անոնց, որոնք ձեզմէ նուէր պիտի ստանան, գրեթէ միշտ ձեր նուէրները հաճոյք կը պատճառեն ստացողին, որովհետեւ պատահականութեան չէք ձգեր: Ձեր մօտ ամէն բան ծրագրուած ու նախատեսուած է մեծ սիրով եւ գուրգուրանքով:

Հետաքրքրական Հաստատումներ Բոյսերու Մասին

- Մասնագէտներու կարծիքով, բոյսերը ոչ միայն ուրախ մթնոլորտ կը ստեղծեն, այլեւ կը բարելաւեն սենեակին թթուածինի որակը:
- Բոյսերը դրական ազդեցութիւն կը գործեն ստեղծագործական միտքին վրայ եւ կը նպաստեն կեդրոնացումին:
- Բոյսերը օդը կը մաքրեն փոշիէն եւ աղտէն:
- Գրասենեակներուն մէջ բոյսերը կը բարձրացնեն աշխատանքի արտադրողականութիւնը:
- Այն հիւանդանոցները, ուր կան կանաչ գօտիներ, հիւանդները աւելի շուտ կ'ապաքինին, քան՝ այն հիւանդները, որոնց հիւանդանոցներուն մէջ բոյսեր չկան:
- Բոյսերը զարմանալիօրէն կը կլանեն աւելորդ ձայները, վտանգաւոր նիւթերը եւ կը պահպանեն խոնաւութեան մակարդակը:



Այս բոլորը իմանալէ ետք չ'ա՞րժեր բոյսերով շրջապատուիլ...

www.kantsasar.com